

Arfattat angisuut pissatallu nalunaarutigineqartarnerat pillugu Namminersorlutik Oqartussat nalunaarutaat

Piniarneq aallaaniarnerlu pillugit Inatsisartut inatsisaanni nr. 12-imi 29. oktober 1999-imeersumi kingusinnerusukkut inatsisartut inatsisaatigut nr. 1 16. maj 2008-meersukkut allanngortinneqartumi § 2, imm. 4, §§ 12, 13 aamma § 17 naapertorlugit aalajangersarneqarpoq:

Atuuffia

§ 1. Tikaagullimmik arfermilluunniit tikaagullimmit anginerusumik pisaqartoq pissaasorluunniit tamatuminnga piaartumik kommuniminut nalunaaruteqassaaq. Ataatsimoorluni piniarnermi toqqagaalluni aquttoq nalunaaruteqassaaq.

Imm. 2. Kitaani tikaagulliit, tikaagulliusaat, arfviit aamma qipoqqaat pisat pissatallu tamarmik kommunimut pisassiissutinit ilanngaataassapput ukiumi pineqartumi imaluunniit ukiumi tullermi. Tunumi tikaagulliit pisat pissatallu tamarmik ingerlatsivimmi pisassiissutinit ilanngaataassapput ukiumi pineqartumi imaluunniit ukiumi tullermi.

Imm. 3. Immersuiffissaq akuerisaq (ilanngussaq 1) atorlugu kommunip allaffianut kommunilluunniit nunaqarfimmi allaffianut qaninnerpaamut nalunaaruteqartoqartassaaq, tassanngaaniillu piaartumik nalunaarut pisaqartup kommunianut ingerlateqqinneqassaaq.

Arfanneq

§ 2. Arferit § 1-imi taaneqartut pisarineqareeraangata immersugassami makku nalunaarutigineqartassapput:

1) arfermut tunngatillugu (immersugassami B-E):

a) Suunera.

b) Takissusia, kakkiviaata nuuaniit sarpiisa kiggaannut uuttorlugu.

c) Suiaanera.

d) Arnaviaappat: immoqarnerseq, illaaqarnerseq, taamaassimappallu illaava qanoq takitiginerseq suiaanersorlu.

e) Sunik aqajarormioqarnerseq.

2) piniarnermut tunngatillugu (immersugassami A, F, G, H, I aamma J):

a) Ulloq pisaqarfik, piniartup aqqa, inuttut normua, ataatsimoorluni piniarnermi piniaqataasut aqqi inuttullu normui, allaffisiap tunuanut allanneqassapput.

- b) Angallatip aqqa GR-normualu, ataatsimoorluni piniarnermi; angallatit aqqi GR-normuulu imaluunniit angallateeqqat qassiunersut.
- c) Pisaqarnissamut kommunip akuersissutaata normua.
- d) Pisaqarfiup sumiinnara, allorniusat sanimukaartut ammukaartullu imaluunniit feltkode (sumiiffik immikkut ilisarnaasigaq), Kalaallit Nunaanni Aalisarnermik Avatangiisinillu Misissuisoqarfiup feltkodinut tunngatillugu assiliaa naapertorlugu, atorlugu. Imaluunniit allatut paatsuugassaanngitsumik nalunaarutigalugu.
- f) Pilaffik.
- g) Pisap oqimaassusaa nerineqarsinnaasut missingerlugit; kilogram mattak, orsoq, qiporaq, neqi kiisalu tamakkerlugu oqimaassusaa. Kiisalu misissugassamik peersisoqarsimanersaq Pinngortitaleriffimmullu nassiullugu. Tikaagulliusaaq, arfivik aamma qipoqqaq eqqarsaatigalugit ilitsiviit/karillu nerineqarsinnaasunik immersinnaasut immikkut qassiuneri aamma ilitsiviup/karillu angissusaat nerineqarsinnaasunik immikkut immerneqarsimasut oqimaassusaat nalunaarutigineqassapput. Kiisalu misissugassamik peersisoqarsimanersaq taannalu Pinngortitaleriffimmut nassiunneqarsimanersaq.
- h) Sakku arfannermi atorneqartoq, nalunaarutigalugu sakku(t) imaluunniit sakkup(t) sulloqqortussusaa(t) sorleq atorneqarsimanersaq. Qamutilimmik sakkoqarsimagaanni tuukkaq qaartartoqarsimanersaq nalunaarutigineqassaaq. Tuukkaq qaartartullip sorliunera aamma serienormua tassunga kigartorneqarsimasooq nalunaarutigineqassaaq.
- i) Arfeq qanoq sivistutisumik toqujartorsimanersaq nalunaarutigineqassaaq, tassa eqqortinneraniit toqunissaa tikillugu. Aammattaaq llanngussami I-imi qupp. 3-mi titartakkami nalunaaqutserneqassaaq arfeq sukkut eqqorneqarsimanersaq. Minutsit 30-it sinnerlugit toqusaasoqarsimappat tamanna nassuiaatigineqassaaq.
- 3) immersuisup aqqa ullorlu immersuiffik. (immersugassami L).

Pissaanermi

§ 3. Arferit § 1-imi taaneqarsimasut pissanneqarsimappata tulaanneqaratik makku nalunaarutigineqassapput (immersugassami A, B, F, I, K & L):

- 1) Ulloq pissaaffik, piniartup aqqa aamma inuttullu normua, ataatsimoorluni piniarnermi peqataasut aqqi inuttullu normui immersugassap tunuani.
- 2) Angallatip aqqa GR-normualu, ataatsimoorluni piniarnermi piniaqataasut aqqi inuttullu normui; pujortuleeqqat aqqi GR-normuulu imaluunniit angallateeqqat qassiuneri.
- 3) Arfeq suusimanersaq
- 4) Tikaagullinnissamut kommunip akuersissutaata normua,
- 5) Arfeq sumi pissanneqarsimanersaq, allorniusat sanimukaartut ammukaartullu imaluunniit feltkode (sumiiffik immikkut ilisarnaasigaq), Kalaallit Nunaanni Aalisarnermik Avatangiisinillu Misissuisoqarfiup feltkodinut tunngatillugu assiutaa naapertorlugit imaluunniit sumiiffia allatut ililluni paatsuugassaajunnaarlugu nalunaarutigalugu.
- 6) Pissaanermi sakkut atukkat. Qamutilimmik sakkoqarsimagaanni tuukkaq qaartartoqarsimanersaq nalunaarutigineqassaaq. Tuukkaq qaartartullip type sorliunera aamma serienormua tassunga kigartorneqarsimasooq nalunaarutigineqassaaq.
- 7) pissaasimanermi peqqutaasut suunersut; soorlu assersuutigalugu silap ajornera, atortunik ajutoorneq

il.il. Aammattaaq Ilangussaq I, qupp. 3-mi titartakkami nalunaaqutserneqassaaq arfeq sukkut
eqqortissimanersaq.

8) Immersuisup aqqa ullorlu immersuiffik.

§ 4. Kommunalbestyrelsi pisussaavoq qularnaallillugu uppersarsineqarpat arfermik unioqqutitsilluni
pisaqartoqarsimasq imlt. pissaasoqarsimasq tamatuma mailikkut imlt. oqarasuaatikkut kiisalu
immersugassaq atorlugu nalunaarutiginnissaanut. Nalunaarut tuaviortumik mailikkut imlt. faxikkut
Aalisarnermut, Piniarnermut Nunalerinermullu Aqutsisoqarfimmut nassiunneqartassaaq.

Imm. 2. Naalakkersuisut kommunalbestyrelsi piumaffigisinnaavaat akuersissutit tunniunneqarsimasut
atorunnaarseqqullugit kommunalbestyrelsi paasissutissanik piffissaq eqqorlugu Naalakkersuisunut
nassitsisarsimangippat imaluunniit paasissutissanik amigartunik nassitsisarsimappat.

§ 5. §§ 1, 2, aamma 3-mik unioqqutitsisoq akiliisitaasinnaavoq.

§ 6. Nalunaarut atortuulissaaq 13. august 2010.

Imm. 2. Tamatumunnga peqatigitillugu arfattat pissatallu nalunaarutigineqartarnerat pillugu nalunaarut
nr. 10 17. april 2009-meersaq atorunnaarpoq.

Namminersorlutik Oqartussat, 16. juli 2010-meersaq.

Ane Hansen

/

Jens K. Lyberth

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

